

**Uunga siunnersuut: Namminersornerullutik Oqartussat missingersuutaat (2016-imut aningaasanut inatsisissaq, nunamut tamarmut akileraarutissaq, kommunit missingersuutissaq, nunamut tamarmut akileraarutissaq, kommunit missingersuutissaq aamma ulluunerani paaqqinnittarfinnut akiliutissat) pillugit Inatsisartut inatsisaata allangortinneqarneranik Inatsisartut inatsisaat nr. x, xx 2015-imeersoq.**

(Aningaasaqarnermut, Aatsitassanut, Nunanullu Allanut Naalakkersuisoq)

### **Saqqummiussissut**

(Aningaasaqarnermut, Aatsitassanut, Nunanullu Allanut Naalakkersuisoq)

### **Siullermeerneqarnera**

Siullermik, inatsisissatut siunnersuutip uuma tuaviuullugu suliarineqarnissaata Inatsisartunit akuerineqarnera Naalakkersuisut sinnerlugit qujassutigaa.

2016-imut aningaasanut inatsisissatut siunnersuutip aappassaaneerineqarnissaata pingajussaa-neerineqarnissaatalu kinguartinneqarnissaat Inatsisartut Siulittaasoqarfiata aalajangerpaa. Inatsisartut Aningaasanut inatsisissatut siunnersuummik suliaqarnissaminni piffissaqarluarnissaat pingaartuuvoq. Inatsisartut 2016-imut aningaasanut inatsisissatut siunnersuummik pingajussaaneerinissaat 22. novemberimut ullulerneqarpoq.

Missingersuutinut inatsimmi aamma Inatsisartut Naalakkersuisullu pillugit Inatsisartut inatsisaanni allassimavoq aningaasanut inatsisissaq kingusinnerpaamik 15. november akuersissutigineqartassasoq. Aammattaaq Akileraartarnermut inatsimmi allassimavoq nunamut tamarmut akileraarutip aamma nunamut tamarmut immikkut akileraarutip procentii kingusinnerpaamik 15. november angissusilerneqartassasut. Taassuma ukiumi tulliuuttumi Aningaasanut inatsimmut ilanngullugu pisarnera nalinginnaasuuvoq.

Inatsisissatut siunnersuutikkut siunertarineqarpoq aningaasanut inatsisissap akuersissutigineqarnissaanut aamma nunamut tamarmut akileraarutip nunamullu tamarmut immikkut akileraarutip procentinik angissusiliinissamut piffissaliussap 22. novemberimut sivitsorneqarnissaa. Piffissaliussaq taamaaliornikkut ullunik arfineq-marlunnik sivitsorneqassaaq.

Aningaasanulli inatsisissap akuersissutigineqarnissaanut piffissaliussaq sivitsorneqarpat tamanna aamma nunap kommuniinut sunniuteqassaaq. Akileraartarnermut inatsimmi allassimavoq ukiumi tulliuuttumi kommuninut akileraarutip kingusinnerpaamik 1. december angissusilerneqarsimassasut. Kommunit aammattaaq ukiumi tulliuuttumi missingersuutit kingusinnerpaamik 1. decemberimi akuersissutigisimasussaavaat.

Taamaammat inatsisissatut siunnersuutip aamma siunertaraa piffissaliussat taakku sivitsorneqarnissaat, taamaalillutik kommunalbestyrelsit missingersuutinik suliaqarnissaminnut aamma-

Ilu kommunimut akileraarummik angissusiliinissaminnut piffissaqarneroqqullugit. Matumani siunnersuutaavoq piffissaliussap 7. decemberimut sivitsorneqarnissaa.

Kiisalu siunnersuutip aamma kingunerissavaa kommunit, meeqqat suli atualinngitsut peror-saanikkut inerikkiartuutaasunik ulluunerani neqeroorutiniinnerinut akiliutinik angissusiliinis-saannut piffissaliussamik kinguartitsinissaq. Akiliutissat taakku kingusinnerpaamik novem-berip qaammataani kommunalbestyrelsinit angissusilerneqarsimasussaagaluarput. Matumani siunnersuutaavoq piffissaliussap taamatuttaaq 7. decemberimut sivitsorneqarnissaa.

Inatsisissatut siunnersuut ukiup naanerani atorunnaassaaq, tassalu 2015-iinnarmi atuutissallu-ni.

Naalakkersuisut siunnersuut akuersaartumik suliarillaqullugu Inatsisartunut matumuuna suli-assanngortippaat.